

QVÆSTIO MEDICA

CARDINALITIIS DISPVATIONIBVS MANE DISCVTIENDA.

IN SCHOLIS MEDICORVM, DIE IOVIS XXII. FEBRVARII.

M. ROLANDO MERLET, Doctore Medico, Præsede.

An panis, aqua, vita Beata?

TVNC homines beatos & sanos se existimant, cum in vitæ functionibus non præpediuntur, nec torquentur doloribus. Et sane summa humanæ vitæ felicitas, quæ sanitas est, vt absoluta fuctionum animæ, & corporis integritate dignoscitur, sic & definitur: Nec hanc quippiam magis impedire potest, quàm maximus excrementorum prouentus, à quo spiritus, præcipua animæ organa, inficiuntur, & meatus corporis infarciuntur; & sic libero horum præpedito comœatu miseram vitam homo transigit, & natiuo calore penè suffocato luridâ bile suffusus, vel albâ pituitâ tumidus, mortuo fere similis ad cymbam progreditur.

VARIETAS alimentorum vt prauorum succorum, sic & morborum varietatem parit: quare in eligendis cibis, & in exhibendis, summâ est vtendum cautione; atque ideo non solum quantitatis & qualitatis, sed & quoque præparationis, temporis, & ordinis eorum est habenda ratio; alioquin cruditas & confusio, fieret non coctio, si coctu difficilia facilioribus præmitterentur, solida liquidis, & aluum altringentia lubricantibus, necdum confectis prius ingestis eduliis alia denuò intruderentur, & nisi ad id impelleret fames, quam & sitim diuersa coquorum condimenta, irritare potius valent quàm explere, nihil verò melius conducit vtrique sedandæ quàm panis & aqua.

PANIS inter alimenta vt necessitate, sic & salubritate primarium locum jure merito sibi vindicat, maximè si sit confectus ex optimo tritico, quod sit colore aureum, consistentiâ densum, graue, & durum, nec recens nimis, aut vetustum, nec ex solo pingui collectum, & ante triturationem lotum, & postea optimâ & copiosâ aquâ subactum, hanc ob causam cæteris Panis Gonetiacus est præferendus; vt fermentatus, azymo; Salitus, non salito; in furno coctus, focario; & qui compactus ex farina, tenuiori incerniculo excussa, & Pistinis aquaticis potius quam æolicis comminuta. Hic panis vt laudabile, sic & firmum & minime excrementitium corpori alimentum suggerit, nec tantum solidam, humidam, & spirituosam substantiam valet reparare, sed & insuper inter condimenta quoque potest recenseri.

AQVA omnia per omnia nutrit, vt ignis omnia per omnia mouet: inde *ὅλην τροφήν* potest vocitari. Verum non tantum cibis distribuendis & diluendis aqua inseruit, sed & duabus qualitatibus quibus pollet, sitim sedat, & natiui caloris humidum primigenium depascentis actionem remoratur: hinc hydropotæ viuaces. Et cum è cælo & terrâ aqua possit profluere, terrenæ anteponeunda cælestis, maxime illa quæ Ioue tonante decedit, & in cisternâ purissimâ arenâ defœcatur: quæ cum non ita frequenter occurrat, vtendum fontanâ cujus origo versus orientem solem spectet, & in domum per tubos fictiles potius quam plumbeos deferatur: vel fluuiali; quæ vt panis alibilem succum cito distribuit, sic & humidæ substantiæ jacturam refarcit. Hic potus facilis & salutaris: nam (vt vinum) caput non tentat, nec ventrem grauat, sed roborat, nec appetentiam deiecit, sed excitat.

HOC facile parabili conuiuio primorum sæculorum homines longam & sanam vitam tradebant, & nundum repertâ variâ & multiplici obsoniorum & ciborum copiâ, multi morbi ignoti erant, aut non ita frequenter; quare felix panis & aquæ conjugium, quod vt ciborum & vinorum varietas fœturam morborum non parit, sed sanguinem optimum, temperatam & duram carnem procreat. Hic cibus vt sat facile coquitur, sic cito distribuitur & firmiter assimilatur, nec multum nocitura excrementa reponit. *Εὐπρεπὸς καὶ μαροῦδης* hæc mensa sobriis sufficit, sed non lurconibus & abdonimi natis, quibus si non satis ampla & grata videatur, expectanda erit fames, quæ suauem reddat, vel condiendam laborem quem excipiet somnus tranquillus, vini ciborumque vaporibus minime perturbatus. Tunc ad satietatem reficere se licebit, cum panis repletio & corruptio, carniū corruptela sit minus periculosa, & hic conuictus facilis corpori non tantum prodest, sed & mentem multis beat commodis cum tamdiu sit mens sana in corpore sano.

Ergo panis & aqua, vita beata.



Afferebat Lutetiæ ANTONIVS LE MOINE, Parisinus, A. R. S. H. M. D. C. LXIII.